

VALETUDO

MAGAZIN ZA STRUČNU MEDICINSKU JAVNOST

Septembar / rujan 2021

TEMA BROJA

SEPSA, BOLNIČKE
INFEKCIJE I
ANTIMIKROBNA
REZISTENCIJA –
GLOBALAN PROBLEM

INTERVJU

MR. SCI. ADILA DELIĆ,
NEUROFEEDBACK SPECIJALISTA
NEUROFEEDBACK
U BH. MEDICINI

ČLANAK

PRIJE 100 GODINA
OTKRIVEN INZULIN

ALMBIH NOVOSTI
VIJESTI IZ BIH
VIJESTI IZ REGIJE

**OSVOJITE
BODOVE**

e-medikacija.ba
Online stručna edukacija



Otvorenje simpozija "Farmacija budućnosti u Bosni i Hercegovini" / Izvor: My Pharma Space

ERASMUS+ PROJEKT

ODRŽAN SIMPOZIJ "FARMACIJA BUDUĆNOSTI U BOSNI I HERCEGOVINI"

U Sarajevu je u periodu 08.–10. jula 2021. godine održan simpozij „Farmacija budućnosti u Bosni i Hercegovini“. Bio je to uvodni simpozij Erasmus+ projekta za podizanje kvaliteta u visokom obrazovanju pod nazivom "Innovating quality assessment tools for pharmacy studies in Bosnia and Herzegovina /

IQPharm". Projekt okuplja predstavnike bosanskohercegovačkih i europskih univerziteta i privrede.

"Farmacija danas u BiH nije loša, ali uvijek može biti bolje. Projektom smo uvezali naše studente sa fakultetima u Irskoj, Italiji, Srbiji i Hrvatskoj kako bi doprinijeli njihovim kompetencijama. Projekt nam je omogućio i finansijsku podršku zahvaljujući kojoj ćemo opremiti naše laboratorije čime ćemo biti puno konkurentniji za naučno-istraživačke radove. Osim toga, u okviru projekta razvijamo platformu kojom ćemo uvezati različite apoteke i industriju sa studentima koji će tamo obavljati stručnu praksu, radit ćemo na edukaciji mentora i uvezati se sa ekspertima iz prakse. Također, fakulteti će uvesti test kojim će se evaluirati praksa koju su studenti obavili, a sve s ciljem bolje pripreme studenta za tržište rada", kazao je za medije prof.

dr. Tamer Bego, prodekan za nastavu na Farmaceutskom fakultetu UNSA

Trodnevni program simpozija bio je ispunjen sesijama koje su se dotakle tema razvoja globalnog farmaceutskog obrazovanja, ali i interaktivnih radionica koje su imale za cilj inovativni pristup testiranju znanja iz stručne prakse.

Središnja tema Simpozija bila je presjek stanja farmaceutske struke i studija farmacije u Bosni i Hercegovini i u Europi, te prezentacija navedenog Erasmus+ projekta. Osnovni cilj ovog projekta je podizanje kvaliteta i modernizacija studija farmacije na javnim univerzitetima u BiH, uključujući jačanje polustrukturiranog iskusnog obrazovanja u skladu sa EU standardima i propisima visokog obrazovanja, posebno za regulisane profesije, među kojima je i farmacija, a time i bolja zapošljivost svršenih magistara farmacije. (J.H.)